

**Date – 29/03/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. ‘Tumkau Ni’ chu vawiin khan Mizoram puma kohhran hrang hrangin urhsun takin an hmang.
2. Nimin a ruah sur leh rial tla avang khan Lawngtlai District Thaltlang khua ah in 13 luahzui tlak lohin a chhia a, indang 28 a chhe nual bawk.
3. Gauhati High Court chuan Sairang leh Vairengte inkar kawngpui siamthat hna thawktu chu hna an la zawh loh engtin nge April thla chungang an zawh theih dan tur a zawt.
4. Prime Minister Narendra Modi-a'n ram mipuite chu dawt thu lengvak awihlo tur leh sorkar thuchhuak ring ngam turin a ngen.



**PALM SUNDAY**

Kristian te ni pawimawh Jerusalem khawpuia Isua Krista lal anga a luhna ni hriatrengna, ‘Tumkau Ni’ chu vawiin khan Mizoram puma kohhran hrang hrangin urhsun takin an hmang.

Tumkau Ni hi Isua Krista krawsa khenbeh anih hma Pathianni hnunung bera hman thin a ni a. He ni pual hian tukin khan Mizoram hmun hrang hrangah kohhran hrang hrangin kawng an zawh a, Kohhran tam zawkah chuan Sunday School zirlai, zirtirtute leh Kohhran mipuite tumkau kengin ‘Hosanna’ tiin zingkarah khawlai fangan an au rual a, Pathian fakna hla te an sa bawk a ni.

Tumkau Ni pual hian Mizoram chhunga kohhran hrang hrangte chuan chawhma, chawhnu leh zanah inkhawm programme an duang a. Kohhran thenkhat chuan chawhma Sunday School neiin chawhnu leh zanah Tumkau ni pual in hun an hmang thung a. Kohhran thenkhat chuan Tumkau Ni pual hian thupui bik neiin hun an hmang bawk a, Mizoram District hrang hrangah pawh kohhran hrang hrangte'n an remchan dan ang zelin Tumkau Ni pual hian hun an hmang a. Catholic Kohhran te tan chuan vawiin hi Lungngaih Pathianni/Passion Sunday a ni a, Hapta Thianghlim/Holy Week intanna a ni bawk a, Mizorama Parish Centre leh Kohhran Station hrang hrangah te chuan Puithiamte'n mal an sawm sa Tumkau kengin kawng

an zawh a, chawhma inkhawm hun pangngaijah inkhawm chhunzawmin, inkhawmna urhsun Mass hlanna neih a ni a. Puithiam awm lohna Station-ahte chuan Mass Inkhawm, lo zawmna hun hman a ni.

Parliamentary Affairs Minister Kiren Rijiju leh Fisheries, Animal Husbandry and Dairying leh Minority Affairs -a Minister of State George Kurian te chuan Kristiante ni pawimawh Jerusalem khawpuia Isua Krista lal anga a luhna ni hriatrengna, 'Tumkau Ni' pualin he ni serhtu zawng zawngte chibai an buk ani.

Union Minister zinga Kristian awmehhun Union MoS for Minority Affairs George Kurian chuan chawlkar thianghlim intanna Tumkau Ni puala chibai bukin, he ni thianghlim hian mitin thinlung chu remna, beiseina, inngaitlawmna leh thlarau thar in chung khat se a duh thu a sawi a.

Minority Affairs Minister Kiren Rijiju pawhin Tumkau Ni hmangtu Kristiante chu chibai bukin, he ni thianghlim hi ngilneihna nena hmahruaitu, inngaitlawm taka rawngbawl leh rinna nena hmalam pan zel tura phurna petu ni turin duhsakna a hlan a ni.

<><><>

#### AMC POLLS

Aizawl Municipal Corporation (AMC) ward 19 inthlan awm tur atana candidate-te inhnuhdawh theih hun hnuhung ber chu naktuk chawhnu dar 3 a ni.

AMC inthlan buaipuitu State Election Commission chuan inthlan vote thlak ni atan April ni 21 a ruat a, vote tlate hi April ni 27-ah chhiar a ni ang. State Election Commissioner Dr. H. Lalthlangliana chuan kar kalta Zirtawpni khan AMC inthlan lo awm tur chuh tura hming pelut mi 68-te nomination endik a nih thu a sawi a. Candidate 68-te hian endikna an paltlang vek a ni. AMC inthlan lo awm tur hi rorel lai ZPM, MNF leh MPCC te chuan bial 19 an chuh kim vek a. BJP chuan bial 11-ah candidate an nei a. Independent candidate an awm lo. AMC ward 19 zinga 6 chu hmeichhe tan chauha chuh theih tura ruat a ni a. He tih lai hian tu pawhin a chuh theih bialah hmeichhe candidate 7 an awm a ni.

AMC inthlan lo awm turah hian vote nei hmeichhia nuai 1, sing 2, sang 8 leh 470 mipa nuai 1, sang 9 leh 376 awmin vote nei zawng zawng hi mi nuai 2, sing 3, sang 7 leh 846 an ni a. Polling station 257 awmin a tul anga auxiliary polling station siam belh a ni ang. Inthlanna atan hian Bharat Electronics Limited (BHEL) siam electronic voting machine (EVM) hman a ni dawn a ni.

<><><>

#### HAILSTORM HAVOC

Nimin chawhnu lam dar 2 leh dar 3 inkar a ruah sur leh rial tla avang khan Lawngtlai District chung, Sangau RD Block huamchhunga Thaltlang khua ah in 13 luahzui tlak lohina chhia a, indang 28 pawh a chhe nual.

Kumdangah pawh tun ang hun hi Sangau leh a chhehvel ten ruah leh rial vanga harsatna an tawh thin hun a ni a. Nimin a ruah leh rial thawk hian a bikin Phawngpuitlang bula awm Thaltlang chu a nuai nasa zual ani. Lawngtlai DM&R hnathawkte hnen atanga thudawn danin in 13 chu luah zui tlak loh khawpin rial hian a deng chhia a, in dang 28 pawh engtin tin emaw silpoulin nen tangkawpin luah zui nawk nawk theih tur a ngaih a ni. Vawiin khan Lawngtlai district bawrhsap Pu Donny Lalruatsanga'n mamawh hmasa a hman atan silpouline engemawzat Thaltlang khua-ah hian thawnin, in chhiate chu kimchang zawka zir chian a nih hnuah chhawmdawlina awm thei ang angte ngaihtuah a nih tur thu a sawi ani.

Lai Autonomous District Council a Chief Executive Member Pu C. Lalsawmzuala chuan rial vanga harsatna tawkte a tawrhpuu thu sawiin, a hmunah thil awmdan enfiah turin DM&R Officer tirh anih thu leh, LADC Sorkar chuan chhawmdawlina awm thei angte a ngaihtuah tur thu a sawi. Thaltlang hi in 110 awmna khua a ni.



#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh [newsonair.gov.in](http://newsonair.gov.in) ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



#### COURT-HIGHWAY

Gauhati High Court chuan Sairang leh Vairengte inkar kawngpui siamthat hna thawktu pakhat chu hna an la zawh loh za zela 65 chu engtin nge April thla chhunga an zawh theih dan tur a zawt.

Justice Michael Zothankhuma leh Justice Nelson Sailo te thutna bench chuan Mizoram Truck Drivers Association (MTDA) in an pawl general secretary Pu Lalhmudika Tochwawng kaltlang a Aizawl leh Silchar inkar kawngpui chhe lutuk chungchanga public interest litigation (PIL) an thehluh a ngaihtuahna kal zelah Nilaini khan he thil hi a ngaihtuah leh a, Judge-te chuan he lai kawngpui tuan enkawltu National Highways and Infrastructure Development Corporation Ltd. (NHIDCL) chu an hnuai a contractor J. Infratech Limited-in hna an thawh dan report affidavit hmangin chawlhkar 2 chhungin court-ah thehltur turin an ti a. Contractor hian kawng siamthatna atan hian lung chang tha (limestone rock) a hmang em tih finfiah turin leh, contractor pawh lung chang tha an hmang ngei em tih affidavit thehltur turin a hriattir bawk.

Contractor J. Infratech Limited hian Sairang Zero Point leh Buichali lei inkar, New Khamrang leh Kawnpui inkar leh Kolasib leh Bilkhawthlir inkar siamthat hna an thawk mek a ni.

J. Infratech Limited ukil Pu Anil Kumar chuan a hma lamah khan kumin April thla chhung ngei a hna thawh zawh fel an tum thu affidavit hmanga a thehluh thu sawiin tun dinhmunah hna hi za zela 35 chauh an la zawh thu a tarlang a. Court chuan J. Infratech Limited chu affidavit hmang ngei-in an hna la thawh bak za zela 65 chu engtin nge April thla chhunga thawh zawh hman an tum dan chiang taka ziak lang turin a hriattir a, chu bakah kawngpui siamthat hna an thawhna hrang hrang dinhmun

chiang taka ziaak turin an ti bawk. He thubuai hi April ni 22 a ngaihtuah leh tura dah a ni.



**MANN KI BAAT**

Prime Minister Narendra Modi-a'n West Asia boruak chu enghelhawm a tih thu sawiin petrol leh diesel-ah ram hrang hrangin harsatna an tawk chho mek a ni, a ti.

Vawiin Akashvani-a Mann Ki Baat hun a hmanna-ah he thu hi sawiin buaina thlenna bial chu India energy mamawh lak luhna ber anih avangin hun khirh tak a thleng mek a ni, a ti a, India-in thiantha ram tam tak a neih avang leh sorkarin kum 10 kalta chhunga hmasawna thahruai a lo sawh ngheh azarah India chuan heng harsatnate hi hlawhtling takin a la hmachhawn thei zel a ni, a ti a, ram mipuite chu fim taka awma dawt thu leng vak awihlo tur leh sorkar thuchhuak erawh ring ngam turin a chah bawk.



**WEST ASIA CRISIS**

Iran-in missile leh drone-a UAE, Kuwait leh Bahrain ramte, nasa taka a kah leh avangin Gulf ram defence force-te inralring rengin an awm a, hei hi US leh Israel-in Iran steel plant pawimawh 2 an kah chhiat chhan letna nia hriat a ni.

Emirates Global Aluminium chuan Abu Dhabi-a an thil siamchhuahna hmun kah chhiat anih thu an sawi a, Alba tia hriat, Aluminium Bahrain pawhin Iran-in an factory an kahna lamah hnathawktu 2-in hliam tenau an tawrh thu a sawi a ni. UAE Defence Ministry chuan nimin ringawtah ballistic missile 20 leh drone 37 an kah thlak thu a sawi bawk.

Hetih lai hian Israel chuan Iran ram khawpui Tehran chu nasa takin a kap leh a, Israel Defence Forces (IDF) sawi danin ralthuam dah khawmna hmun leh siamchhuahna hmun engemawzat an kah chhiat bakah aerial defence system leh observation post engemawzat an kap chhe bawk a ni.

